



Асұдайдың жаңа халқы

Құтқарушымыз Исадағы
жаңа өмірдің Киелі
кітаптағы сипаттамасы

Оқырман назарына

Еіздің қолыңыздағы кітапша Құдайдың Иса Мәсіхке сенетіндерге сый ретінде беретін жаңа өміріне ие болғандарға арналған жолсілтеме болып табылады. Кітапша хат түрінде жазылған қысқаша 10 сабақтан тұрады.

Әрбір сабақта жаңа өміріміздің түрлі салалары талқыланады. Осы кітапшаны оқып отырғаныңыздың өзі сіздің Иса арқылы Құдаймен кездесіп, рухани жаңа адам болғаныңызды білдіреді (Қорынттықтарға арналған 2-хат 5:17).

Алайда, сіз осы жаңа өмірді толығымен танып білмеуіңіз мүмкін. Егер Құдайға толығымен сенім артатындығыңызға күмәнданатын болсаңыз, содан арылуға дәл қазір мүмкіндігіңіз бар. Құдай адамды мүлтіксіз жаратты, бірақ Адам атаның Құдайға мойынсұнбауының салдарынан дүниеге күнә енді. Күнә бізді Құдайдан ажыратады. Құдай осы ажыраудың әрі қарай жалғасуын қаламағандықтан, Ол бізді Өз отбасына қабылдау үшін жоспар жасады (Киелі жазбада бұл “қайтадан туылу” ретінде сипатталады). Құдайдың Киелі Сөзі біз күнәларымызға өкініп, теріс жолымыздан қайтып, Исаға сенім артып, Оны жүрегімізге қабылдағанда, Оның рухани балалары болатындығымызды үйретеді (Жохан жазған Ізгі хабар 3:16; Елшілердің істері 2:38).

Біз Исаны шын мәнінде Кім екендігін мойындау арқылы қабылдаймыз, яғни Оны өз ауызымызбен Жаратқан Ие деп жариялаймыз (Римдіктерге арналған хат 10:9). «Жаратқан Ие» сөзі — Исаның бүкіл ғаламдағы өмір атаулының ең жоғарғы билеушісі дегенді білдіреді. Иса Құдайды барынша анығырақ ашып беру үшін, жер бетіне адам тәнін қабылдаған Құдай ретінде келді. Бұл жайлы Киелі жазбаның келесі үзінділерінде айтылған: Матай жазған Ізгі хабар 3:16-17; Елшілердің істері 2:36; Філіпіліктерге арналған хат 2:5-11; Қолостықтарға арналған хат 1:15-20; 2:9-10.

Киелі Рух Исаны Құдайдың жібергендігіне жүрегімізбен сенуіміз керектігіне үйретеді (Жохан жазған Ізгі хабар 6:29). Иса біздің күнәларымыздың құнын өтейтін құрбандық ретінде біздің орнымызға өлді (Жоханның 1-хаты 2:2; 4:10). Осылайша Ол Құдай мен біздің арамыздағы кедергіні бұзды. Сондықтан да

біз Исаның құрбан болуының аркасында Құдайдан күнәларымызды кешіруін сұрай аламыз. Өлгеннен кейін арада үш күн өткен соң, Иса қайта тірілді (бұл бізге «қайта тірілу» ретінде белгілі; Лұқа жазған Ізгі хабардың 24-тарауын оқып шығыңыз). Киелі кітап құтқарылуымыз үшін осы Ізгі хабарға сенуіміз керек деп үйретеді (Римдіктерге арналған хат 10:9). Қайта тірілу арқылы Иса Өзінің Тәңір екендігін дәлелдеді (Римдіктерге арналған хат 1:4). Құдай Сөзінде былай делінген: “Егер Мәсіх қайта тірілмеген болса, онда біздің жариялауымыз да, сендердің сенімдерің де бекер болғаны” (Қорынттықтарға арналған 1-хат 15:14).

Құдайдан бізді (және бір-бірімізден) күнәларымыз ажыратып тұрғандықтан, Құдайдан күнәларымызды кешіруін сұрауымыз қажет. Сонымен бірге күнәларымыздан бас тартуымыз керек (бұл «тәубе ету» деп аталады). Тәубеге келу — бұрынғы күнәкар өмір сүру салтымыздан бас тартып, Құдайға бет бұруды білдіреді. Тәубеге келу — біздің өзгерген өмір сүру салтымыздан көрінеді.


Тәубеге келуіміз арқылы Құдайдың рухани балалары екендігімізді және Исаның біздің Иеміз екендігін көрсете аламыз.

Егер сіз Исаның Ие екендігіне, Оның күнәларымыз үшін құрбан болып, өлімнен қайта тірілгеніне сенсеңіз және күнәларыңыздан бас тартқыңыз келсе, онда сіздің мына мінажатпен сиынуға дайын болғаныңыз:

Көктегі Әкеміз,

Менің күнәларым үшін құрбан болуға Өз Ұлың Исаны жер бетіне жібергеніңе алғыс айтамын. Сен Оны тірілткендігіңе және Оның Жаратқан Ие екендігіне сенемін. Менің барлық күнәларымды кешіре гөр. Мен өз күнәларымнан бас тартып, тек Саған бет бұрамын. Мені Өз балаң ретінде қабылдағаныңа рахмет айтамын. Исаның атымен, Амин.

Бағушы Нейтон Харрис



Қымбатты Құдайдың рухани баласы!

Құдай Әкеміздің және Иса Мәсіхтің атынан саған сәлем беремін!

Тәңіріміз Исаның соңынан еруге қабылдаған берік шешімін туралы естігеніме өте қуаныштымын. Саған Исадағы жаңа өміріңе қатысты Киелі кітап не нәрсеге үйрететіндігі жайында айтатын бірнеше хат жолдағым келеді. Киелі кітапты («Киелі кітап» — орыс тіліндегі «Библия», яғни «кітап» деген мағынаны білдіретін латын сөзі) оқуда сен үлкен жетістіктерге жетіп жатырсың деген үміттемін. Киелі кітап — Оның рухани балалары — біз үшін жазылған Әкеміздің арнайы кітабы. Өзімнің хаттарымда осы Киелі кітаптың бірқатар үзінділеріне сілтемелер жасаймын. Өз бетінше зерттеу жүргізе алуың үшін сол үзінділерді тауып, оларды оқып шыққаның дұрыс (Киелі кітаптың мазмұны өзіңе қажетті кітаптарды тез табуына көмектеседі).

Құдайдың отбасының мүшесі болған адамда қандай сезім пайда болмақ? Елші Жохан былай деген: “Қарандар, Әкенің бізге деген сүйіспеншілігі қандай зор, Құдайдың рухани балалары деп аталамыз және нақ солаймыз да” (Жоханның 1-хаты 3:1). Құдайдың бізді Өз туған балаларындай жақсы көретіндігі жайлы ойланудың өзі қандай керемет! Мұндай өзара қарым-қатынас “қайтадан туылудан” (Жохан жазған Ізгі хабар 3:3, 5) кейін басталады дейді Иса. Мәсіх арқылы Құдай бізден жаңа жаратылыс жасады. Құдай — біздің Көктегі Әкеміз, ал Иса — біздің “үлкен бауырымыз” (Еврейлерге арналған хат 2:11, 17). Осы ғажайып

сүйіспеншілік жүрегінді толтырып, сенің Құдайдың отбасының мүшесі екендігіне кепілдік пен нық сенімділік берсін.

Енді, Құдайдың баласы болып аталған соң, сен Оның отбасының нағыз мүшесі болуың керек. Адамдар істеріне қарап, сөздерінді естігенде, сен арқылы Көктегі Әкемізді көрулері керек: “Сонымен, сүйікті рухани баласы ретінде Құдайдан үлгі алындар” (Ефестіктерге арналған хат 5:1). Құдайдың рухани баласы болғандығымыз, біздің әрдайым рухани өсіп отыруымыздың қажеттігін білдіреді. Өкінішке орай, біздің күнәларымыз кешірілсе де, күнә жасауды әлі де доғара алмай келеміз. Ал жаңа өміріңнің бастауы болған тәубе ету, Мәсіхтегі бүкіл өмірінде жалғасуы керек. Біз Құдайдың рухани балаларымыз, сондықтан Ол бізді Әке ретінде Оны тындап, мойынсұнуға шақырады (Еврейлерге арналған хат 12:5-11). Бұл біздің Оның нағыз рухани балалары екендігімізді дәлелдейді. Көктегі Әкеміз біздің әрбір жасаған ісімізге және айтқан сөзімізге мән береді, себебі бұл дүние Оны біз арқылы таниды.

Жақсы отбасының мүшелері жиі бас қосып тұрады. Құдайдың отбасының жиналысы сені дәл қазір күтіп тұр. Біз сенушілердің жиналысында кездесіп тұрамыз. Жалпы әртүрлі дәстүрді ұстанатын көптеген қауымдық жиналыстар бар, бірақ мұндағы басты нәрсе — Исаның және Оның сөзінің болуы. Жаңа Келісімнің түпнұсқасы грек тілінде жазылған болатын. Біз қолданатын «қауым» сөзі «Құдайдың меншігі» және «жиналысқа шақырылған» деген мағынаны білдіретін екі сөзден құралған. Сондықтан қауым мүшелері өздерінің Құдайдың меншігі екендіктерінің белгісі ретінде бірге жиналу үшін әлемнің әр түкпірінен шақырылады. Құдаймен кездесудің жалғыз жолы — тек Иса арқылы, ал Исаны білу — тек Киелі жазба арқылы ғана мүмкін. Егер сен баратын қауым осыны үйретсе, ол сенің дұрыс жолда жүргендігіңді көрсетеді. Сенде қауымда жақсы мәсіхші достар кездестіре алуға, сенімінде және қызметінде, Құдайға табынуың мен мадақтауыңда және Киелі кітапты өз бетінше зерттеуде қалай рухани өсуге болатындығына үйренуге мүмкіндік болу керек. Құдаймен тығыз қарым-қатынаста жүрудің ең тиімді жолдарының бірі — Оның рухани отбасы — қауым жиналысын ешқашан қалдырмау (Еврейлерге арналған хат 10:24-25). Сен Құдайдың уәделерінің рас екендігіне толықтай сенімді бола аласың. Оның ғасырлар бойы бүкіл әлемдегі

бізге дейін өмір сүрген бауырларымызды қалай жарылқағандығына қарашы. Сенімің өз сезімдерің арқылы емес, Оның дәлелді сөздерімен қалансын. Себебі сезімдер тұрақты емес, ал Құдай Әке және Оның Сөзі ешқашан өзгермейді: “Өйткені Мен — Құдай, Мен ешқашан өзгермеймін... Даланың шөбі қурап, гүлдері солады, ал Құдайдың сөзі мәңгілік қалады” (Малахи пайғамбардың жазбасы 3:6; Ишай пайғамбардың жазбасы 40:8).

Құдайдың рухани отбасына қош келдің!

Мәсіхтегі бауырың.

Құрметті оқырман! Әр хаттың соңында берілген сұрақтарға жауап жазуыңыз үшін арнайы дәптер бастаңыз.

Әрі қарай ойлануың үшін: Құдайдың рухани баласы

Құтқарылу бір мезетте болады, ал Исаға ұқсау — өмір бойына жалғасады. Құдайдың сені рухани өсіріп жатқаны жайлы ойлан және оған қуан.

Өзің арыла алмай жүрген жаман әдеттеріңнің біреуін ата. Сол үшін Құдайға сиын. Құдайға бірігіп сиына алатын сенімді досың бар ма?

Өзіңнің жеке Киелі кітабың бар ма?

Осы кітаппен толығымен танысып шығуға біраз уақытыңды бөл. Оның мазмұнын зертте. Киелі кітаптың 66 кітабымен, оның ішіндегі Көне Келісімнің 39, Жаңа Келісімнің 27 кітабымен таныс.

“Рухани үйім” деп айта алатын сенушілердің жиналысы өтетін қауымды іздеп жүрсің бе?



Құбылбатты сәби!

Алдыңғы хатымда Құтқарушымыз Иса Мәсіхтің бүкіл әлемдік отбасына мүше болғанында сәлем берген едім («Мәсіх» сөзі көне еврей тілінен аударғанда «майланған» деген мағынаны білдіреді. «Христос» сөзі де грек тілінен аударғанда осы мағынаны білдіреді). Сен осы отбасының толық құқықты мүшесің, алайда әлі толығымен жетіле қойған жоқсың. Әрине, мұны ауыспалы мағынада айтып отырмын. Тәндік жағынан жетілген адамсың, бірақ сен «... Иса Мәсіхтің өлімнен қайта тірілуімен сөнбес үмітке кенеліп, рухани қайта туылдың» (Петірдің 1-хаты 1:3). Сонымен жақында ғана туылған рухани сәби болдың. Елші Петір былай деп жазған: «Жаңа туған сәбидің сүтке шөліркегеніндей, әрдайым Құдай сөзінің таза сүтіне құштар болыңдар. Содан нәр алғанда рухани өсіп, күнәның құлдығынан толығырақ құтқарыла аласыңдар» (Петірдің 1-хаты 2:2). Көз алдыға тамақ жемейтін сәбиді елестетіп көрші! Көп ұзамай сол сәбидің қайтыс болғанын жоқтап, жылаған болар едік. Дені сау бала өсу үшін уақытымен тамақтануы керек. Сол сияқты сенің де Құдай сөзінен күш алып, басқа да сенуші бауырластармен қарым-қатынаста болып, Құдайға қызмет етуде белсенді атсалысуың қажет. Сәбидің қалай тамақтанатынын байқап көріп пе едің?

Біріншіден, ол әрдайым дағдылы уақытта тамақтанады. Сен де Киелі кітапты күніне бірнеше рет оқуың керек. Киелі кітапты оқып, сиыну үшін танертеңгісін жарты сағатқа ерте тұр. Біраз уақыт өткен соң бұл сәттер сен үшін ерекше болатындығы

соншалық, тіпті сол мезетті асыға күтіп, ұйқыннан бірнеше сағат ертерек тұратын боласың. Бос уақыттарыңда Құдай сөзінен нәр алып тұруың үшін өзіңмен бірге Киелі кітаптың кішірейтілген үлгісін алып жүр. Күнделікті кешкісін, ұйықтар алдында Киелі кітапқа көңіл бөлуді ұмытпа.

Екіншіден, сәби тамақты толық сенімділікпен ішеді. Айналада оның жас ақыл-ойы үшін түсініксіз нәрселер өте көп. Бірақ, ол анасының қолында болғанда, ешнәрсеге көңіл бөлмей, сенімділікпен тамақтанады. Құдай Өзінің қойларын қолына алып, алға бастап жүретін Бақташыға ұқсас (Ишая пайғамбардың жазбасы 40:11). Киелі кітапта көптеген терең мағыналы ақиқаттар бар. Мәсіхтің соңынан ерушілердің ешқайсысы да бұлардың бәрін түгелімен толық білмейді. Бірақ Киелі кітап толығымен түсінікті. Сонымен, сенімділіктің қуанышына кенеле отырып, Киелі кітапты оқи бер. Өзінді мазалаған қиын сұрақтарға жауап алуына көмектесе алатын рухани өскен сенушімен танысқаның дұрыс. Адам үшін өте ауыр болып табылатын қиындықтардан алып шыға алатын Бағушымызға сенімдіңді арт.

Үшіншіден, сәбидің қуанышпен тамақтанатынын байқайсың. Ал сен Құдай сөзіне қуанасың ба? Сенде Мәсіхтегі жаңа өмірдің оты жанып тұрма? Құтқарылудың күнделікті рухани өсу екендігін, яғни өміріміздің әрбір күні екендігін есіңнен шығарма. Киелі кітап Мәсіхті тануда рухани өсе алуымыз үшін бізге рухани сүтті де, қою тағамды да береді. Тәңір біздің үнемі рухани өсуді жалғастыруымыз керектігін айтады. «Сүтпен» коректенетіндер Құдай алдында ақталу туралы Ізгі хабарды әлі де не ұқпайды, не дұрыс колдана алмайды. Олар — рухани сәбилер. Тек рухани кемеліне жеткендер ғана «қатты тағамдарды» жей алады. Байыппен ойлануға дағдыланғандықтан да олар жақсы мен жаманды айыра біледі. Сол себепті... одан бетер жетілу үшін алға басайық» (Еврейлерге арналған хат 5:13-6:1).

Мәсіхте өзіңмен бірге рухани өсуші,

Исрааиль бауырың.

Әрі қарай ойлануың үшін: жаңа туылған сәби

Киелі кітапты күнделікті оқуың үшін қандай уақытты қолайлы деп санайсың?

Киелі кітапта сен түсінбейтін үзінділер бар ма? Өзіңнің сұрақтарыңды жазып отыратын арнайы дәптер баста және сол сұрақтарды рухани өскен сенушіге қойып көр.

Қауым жиналысында уағыз тыңдап отырып, бағушы сілтеме жасаған Киелі кітап аяттарын оқисың ба?

Үйге оралған соң осы үзінділерді өз бетіңше зертте.



Қымбатты Киелі Рухқа кенелген мәсіхші!

Сенде Киелі Рух бар ма? Сен Киелі Рухпен шомылдың ба? Бұл өте маңызды сұрақтар.

Ешбір адам Киелі Рухсыз мәсіхші бола алмайды. “Ал бойында Мәсіхтің Киелі Рухы жоқ адам — Мәсіхтің адамы емес” (Римдіктерге арналған хат 8:9). Киелі Рух күнәны айыптап, Иса Мәсіхке деген сенім береді (Жохан жазған Ізгі хабар 16:8-11; Қорынттықтарға арналған 1-хат 12:3). Киелі Рух — жеке Тұлға. Киелі Рух — Құдай. Ол Киелі Үшбірліктің үшінші тұлғасы: Құдай Әке, Құдай Ұлы және Киелі Рух. Құтқарылу туралы Ізгі хабарға сенгенде, Киелі Рух бізді Құтқарушымыз Иса Мәсіхпен біріктіреді. Иса өлімнен қайта тіріліп, арада елу күн өткеннен кейін, Өзінің сонынан ерушілердің шомылдыру рәсімінен өтіп, куәлік етулеріне күш беру үшін Киелі Рухты жіберді (Елшілердің істері 1-2 тарауларды оқып шық). Сонымен, сенім арқылы Исаны қабылдаған кезде, осыдан екі мың жылдан астам уақыт бұрын мәңгілікке келген Киелі Рухпен шомылу арқылы бірігеміз. “Бәріміз бір Киелі Рух арқылы біртұтас рухани денеге біріктік. Барлығымыз да сол бір Киелі Рухқа кенелдік” (Қорынттықтарға арналған 1-хат 12:13).

Киелі Рух — құдіретті. Ол — Құдай. Алуан түрлі кереметтер, ғажап істер, емдеу, бөтен тілде сөйлеу — бұлардың бәрі Ол үшін түк емес. Бізді Мәсіхке ұқсату — Киелі Рухтың жұмысы. Күнәда біз рухани өлі болдық, ал Мәсіхте рухани қайта тірілдік. Құтқарылу — қайта тірілу (Ефестіктерге арналған

хат 2:1-2), қайтадан туылу (Жохан жазған Ізгі хабар 3:3, 5) және “Киелі Рух арқылы жанару” (Титке арналған хат 3:5) сияқты маңызды. Нақ осы құтқарылу кереметінен Оның ғаламат құдіретін көре аламыз. Оның күші біздің өзгеруімізге ықпал ете алады. Біз жаңа болмысқа ие болдық. Біздегі Мәсіхтің Рухы әрбір сөзіміз бен ісімізде Оның сенімді куәгерлері болуымызға мүмкіндік береді (Елшілердің істері 1:8, 4:31). “Сонымен қатар Иса Мәсіхтікі болғандар айқышта өлген Онымен бірігіп кетті. Сол себепті олар өздерінің ескі күнәкар болмыстарынан да, соның құмарлықтары мен тілектерінен де үзілді-кесілді бас тартты. Біз Киелі Рухтың арқасында жаңа өмірге ие болғандай, Оның жетекшілігімен өмір сүре берейік” (Ғалаттықтарға арналған хат 5:24-25). Киелі кітап бұрынғы болмысымызды тастап, Мәсіхтің әділ мінез-құлқын иеленіп, “құтқарылу күні таңбаланған Құдайдың Киелі Рухына тіл тигізбеуге” шақырады (Ефестіктерге арналған хат 4:20-30).

Бізге өміріміздің әрбір күнін, әрбір сәтін күнделікті толтырып отыратын Киелі Рух қажет. Жаңа өмірімізді Киелі Рухпен шомыла алу рақымдылығын қабылдай отырып бастадық. Енді осы Мәсіхтегі өмірімізді ұдайы Киелі Рухқа тола отырып жалғастыруымыз керек. Елші Пауыл Ефестіктерге арнаған хатында былай деген: “Арақ-шарап ішіп, мас болмандар, бұл жүгенсіздікке апарады! Қайта, Киелі Рухқа кенеле беріндер!” (Ефестіктерге арналған хат 5:18). Мас адам оның біртіндеп басқарушы күшіне айналатын ішімдіктің билігінде болады. Өкінішке орай, осы ішімдіктің шырмауы оның бүкіл өмірін құрта алады (Нақыл сөздер 23:29-35 оқып шық). Ал сенушінің тәнін, ақыл-ойын және жанын тек Киелі Рух басқаруы керек. Ефестіктерге арналған хатта “Киелі Рухқа әрдайым кенеліндер” деп бұйырылады. Қандай керемет күш, қандай адал дос — Ол әрқашан сенің қамыңды ойлайды. Сондықтан біздің тарапымыздан жасау керек бір ғана нәрсе — мінажат ету, сонда “Көктегі Әке — Өзінен сұрағандарға Киелі Рухын береді” (Лұқа жазған Ізгі хабар 11:13). Сұраудан қорықпа, өйткені Ол Өзінің балаларына сыйлық бергенді жақсы көреді.

Киелі Рухқа кенелген,

Иоанн Бауырың.

Әрі қарай ойлануың үшін: Киелі Рухқа кенелген мәсіхші

Киелі Рух мінез-құлқыңды өзгертіп жатыр ма?

Өзің арылғың келген әдеттер ше, олар үшін сиынасың ба?

Киелі Рухқа күнделікті кенелу үшін сиынасың ба?



Қымбатты Елші!

Өз қызметінді маңызды деп ойлайсың ба? Шындығында, мәсіхші ретінде сен өте маңыздысың. («Мәсіхші» сөзі грек тілінен сөзбе сөз аударғанда «кішкентай Мәсіх» дегенді білдіреді). Мәсіхтің сонынан ерушілердің Оған ұқсағылары келгендіктері үшін сенбеушілер осылай атаған. Мына үзінділерді оқып шық: Елшілердің істері 11:26, 26:28; Петірдің 1-хаты 4:16. Құдайдың елшісі ретінде саған жер бетінде Оның өкілі болуың үшін маңызды жауапкершілік жүктелген. Сен Құдайдың отбасының мүшесің, сондықтан сен барлық жағдайда Оның өкілісің. Бұл онай міндет емес. Кей кездері сен өзіне біз сенушіміз ғой, олай болса Құдай Көктегі үйімізге неге бірден алып кетпейді деген сұрақтар қойып, таңқалатын боласың. Әрине, егер солай болса, жеңілрек болар еді. Көкте сүйіспеншілігіміз өзімшіл болмай, табынуымыз таза, қызметіміз толығымен адал болады. Онда Құдай бізді неге Көкке дереу алып кетпейді? Оның себебі, біз Көкте жасай алмайтын бір іс бар, ол — Иса Мәсіхке басқа адамдарды да әкелу. Осы жер бетіндегі өмір — құтқарылуымыз үшін берілген мүмкіндік. Мұндай мүмкіндік өлгеннен кейін екінші рет берілмейді (Еврейлерге арналған хат 9:27). Осы өмірде Мәсіхтен және Оның беретін құтқаруынан бас тартқандар Құдайдан бөлінген мәңгілік тозақ отына баруды тандайды. Әрине, бұлай деп айту өкінішті-ақ, алайда Исаның Өзі де Көктегі мәңгілік өмірден гөрі, тозақ туралы көбірек айтты, өйткені Ол ешкімнің де онда баруын қаламайды (Матай жазған Ізгі хабар 25:41; Марқа жазған Ізгі хабар 8:38; Салоникалықтарға арналған 2-хат 1:6-10). Біз Исаны қабылдағанда

шексіз қуаныш пен жарылқауға толы жердің — Көктің азаматтары боламыз (Жохан жазған Ізгі хабар 1:12, 16; Філіппіліктерге арналған хат 3:20; Аян 21:3-4). Алайда біз осындай сезімдердің маңыздылығына өте аз көңіл бөлеміз.

Сен Құдайдың елшісі болып қызмет етіп жүрсің бе? Елші мемлекет басшысы атынан өкілдік етуде сенімді болады. Елші Пауыл былай деген: “Осылайша Мәсіхтің өкілдеріміз; біз арқылы Тәңірдің Өзі адамдарға ескертеді. Мәсіхтің атынан: «Құдаймен татуласындар!»” (Қорынттықтарға арналған 2-хат 5:20). Елші Пауылдың күнәға батқан адамдарды теріс жолдан қайтуға шақыруының өзі қандай керемет: “Иеміз Иса Мәсіхке деген сеніміміз арқылы ақталғандықтан, Оның арқасында Құдаймен татумыз” (Римдіктерге арналған хат 5:1). Иса — біздің қызметімізде Өзі күш беретін Мемлекет Басшысы: “Бірақ сендер Киелі Рух өздеріне қонғанда Оның құдіретін қабылдайсындар, сөйтіп Иерусалимде, бүкіл Яһудея мен Самария аймақтарында және жердің шетіне дейін Маған куә боласындар” (Елшілердің істері 1:8). Исаны қабылдағанда Құдайдың Киелі Рухы сенің өміріне енді (Қорынттықтарға арналған 1-хат 6:19, 20; 12:3; Ғалаттықтарға арналған хат 3:14). Сол себептен Құдайдың Өзі саған Оның елшісі болуына қабілет береді. Біз Оған барлық жағдайда сеніміміз бен жүріс-тұрысымыз, өміріміз бен сөзіміз арқылы куә боламыз. Тәңірімізге құрмет көрсете алуымызға Құдайдың Өзі көмектессін. Жакында ма, қашықта ма, әйтеуір қай жерде жүрсең де куәлік етуде белсенді бол, өйткені бүкіл әлем Исаға мұқтаж. Өзің білетін және жақсы көретін, әсіресе отбасыңның адамдарына Иса Мәсіх туралы Ізгі хабарды қазірден бастап айта бер (Марқа жазған Ізгі хабар 5:19-20). Осылайша Құдайдың сөзімен бөлісіп, Оның қызметін атқару — Оның елшісі екендігінді білдіреді. Ал бұл міндет зор қуаныш әкеледі.

Алайда кейбір адамдардың әлемнің Патшасымен шайқасатындықтары туралы ескерте кетейін. Кейбіреулер Оның сүйіспеншілігі туралы айтқаның үшін сені жек көретін болады. Бірақ сен қорықпа. Иса Өзіне шәкірттер дайындаушылармен дүниенің ақыр соңына дейін бірге болады (Матай жазған Ізгі хабар 28:18-20).

Патшалардың Патшасы елшілігіндегі,

Исаның бауырың.

Әрі қарай ойлануың үшін: Елші

Исаға деген сенімің жайлы өз куәлігіңді жазып қоюға уақытыңды бөл. Бұл басқа адамдарға не туралы және қалай куәлік ете алатындығыңды түсінуіңе көмектеседі. Бұл куәліктің Иса сенің өміріңді қалай өзгерткендігі жөніндегі куәлік екендігін есіңде сақта. Осы куәлігіңнің көшірмесін жіберуіңе мұқтаж адамдар бар ма?

Иса Мәсіх жайлы Ізгі хабармен бөлісе алатын кемінде үш адамды есіңе түсір. Оны жасау үшін ең қолайлы уақыт пен амалды таңдау үшін дұға ет. Бірге сиына алатын адал достарыңмен өз үміттерің жайлы бөліс.

Исаны қабылдағаның үшін сенен біреулер бас тартты ма?

Сен қабылдамаушылықтың ауыртпалығын сезініп көрдің бе?

Сол бас тартқан адамдар үшін сиынасың ба?



Қымбатты Киелі үй!

Сәлем! Енді сен Иса Мәсіхтің соңынан ерушілердің өмірінде қуаныштың да, қиыншылықтың да болатындығын түсінесің. Батыл бол! Құдай сені сүйеді және сен арқылы Өзі әрекет етеді (Філіпіліктерге арналған хат 1:6). Ол әрқашан Өз жұмысын толықтай аяқтайды.

Көне Келісімде Киелі үй үлкен маңызы бар орын ретінде сипатталады. Ең бірінші Киелі үйді Дәуіттің ұлы Сүлеймен тұрғызды. Екінші Киелі үйді Бабылдағы тұтқындаудан кейін Зероббабыл салды. Осы құрылыстар рухани хабарға ие болған, олар келер замандағы Иса Мәсіхке нұскайды (Жохан жазған Ізгі хабар 2:18-22). Киелі үй — Құдаймен кездесетін орын, ал Құдаймен біз толықтай тек Мәсіхте ғана кездесе аламыз (Тімотеге арналған 1-хат 2:5). Сенуші болған кезде, рухани мағынада, біз Құдайдың Киелі үйіне тірі тастар ретінде қаланамыз (Петірдің 1-хаты 2:4-9).

Осы киелі үйді мысалға ала отырып, біздің сеніміміз үшін өте бағалы болып табылатын үш сабақпен бөліскім келеді. Біріншіден, біздің ар-ұжданымыз таза болуы керек. Киелі болу — күнәдан арылып, Құдай үшін бөлінген дегенді білдіреді. Біздің денеміз Құдайдың Киелі Рухы мекендейтін киелі үй (Қорынтықтарға арналған 1-хат 6:19-20). Ендігі біздің міндетіміз — осы киелі үйді күнәға қарсы тұру арқылы таза ұстау. Құдайдың Киелі үйіне данқты бере алмайтын өміріңнің бөлігіне Киелі Рух сенің ар-ұжданыңды әкелсін. Қасиетті өмір кешуге ұмтылудағы

сәтсіздік, біздің әлі сенуші бола қоймағанымызды білдіреді (Қорынттықтарға арналған 2-хат 6:16-18). “Қасиетті өмір сүруге ұмтылусыз ешкім де Жаратқан Иені көре алмайды” (Еврейлерге арналған хат 12:14).

Сол сияқты, киелі үй арқылы Мәсіхтегі бірлік жайлы да біле аламыз. Бір кірпішпен ешқандай ғимарат тұрғызылмайды. Құдайдың қауымдары — киелі үйдің қандай да бір бөлігін білдіретін сенімнің қоймасы. Қандай ұлттан, діни ағымнан болсын, барлық шынайы сенушілер — өсіп өнуші, көп тайпалы, көп тілді және алуан түрлі ғимарат болып табылатын Құдайдың ғажайып киелі үйінің тірі тастары іспетті. Иса Киелі кітап арқылы ашылғанда, Оған деген сеніміміз барлығымызды біріктіреді (Ефестіктерге арналған хат 2:20-22). Біздің бір-бірімізге деген сүйіспеншілігіміз арқылы бірлігіміз көрінеді (Жохан жазған Ізгі хабар 13:34-35). Біздің бірлігімізді көрген адамдардың Иса туралы хабардың ақиқаттығына одан әрі көздері жетеді (Жохан жазған Ізгі хабар 17:20-23). Құдайдың қауымы салмағы, пішіні, тіпті иістері әр түрлі “жануарлар” болған Нұхтың кемесіне ұқсас! Оның сүйіспеншілігі арқылы бірге өмір сүре алуымызға Тәңірдің Өзі көмектессін. Киелі Рух табиғи, тіл немесе мәдени айырмашылықтарымызға қарамастан, Құдайдың киелі үйіндегі барлық сенушілерді біріктіреді. Сондықтан біздің бір-бірімізге дем беруіміз (Еврейлерге арналған хат 3:12-14) және бір-бірімізді қабылдауымыз (Римдіктерге арналған хат 15:7) өзара сүйіспеншілік көрсету арқылы болуы керек.

Біз біле алатын үшінші ақиқат — біздің Мәсіхтегі қауіпсіздігіміз. Киелі үй күшті әрі сенімді, сондықтан біз де Ол арқылы сондай бола аламыз. Иса: “Женіп шыққан әркімді Мен Құдайымның киелі үйінің «бағанасы» қылып қадірлеймін; ол содан ешқашан шықпайтын болады” деп уәде еткен (Аян 3:12). Сол сияқты біздің сенімділігіміз де Құдайдың берік уәдесіндей күшті. Оның Патшалығы ешқашан шайқалмайды (Еврейлерге арналған хат 12:28). Ар-ұжданымыздың тазалығын, Мәсіхтегі бірлікте сүйе алатын рухты және Оның Сөзіне деген берік сенімділікті сақтап тұруымызға Құдайдың Өзі көмектессін.

Онымен тығыз бірліктегі,

Мәсіхтегі бақырың.

Әрі қарай ойлануың үшін: рухани үй

Сен өміріңде қандай өте ауыр моральдық қиыншылықтармен кездесіп жүрсің?


Осы қиыншылықтарды азайту үшін өз өміріңде қандай да бір нәрсені өзгерте аласың ба?

Өзіңе лайықты отбасылық қауым таптың ба?

Жергілікті қауым жиналысына қосылу, сенің Мәсіхтің денесінің бір мүшесі екеніңді білдіреді. Құдайдың қауымы бүкіл әлемде, яғни Иса және Оның Сөзі құрметтелетін барлық аймақтарда өсіп-өнуде. Өзіңді басқа адамдармен жалғастыратын рухани көпір тұрғызып жатқаныңа сенімді бол. Қабырғалар емес, көпірлер!!!

Сені қандай да бір қорқыныш не күмән мазалайды ма?

Осы қорқыныш пен күмән сенімде өсу кезеңінің ажырамас бөлігі. Мұның бәрін Құдайға тапсыр, өйткені Ол сенің қамқоршың.



Үнемі жаттығып жүрген қымбатты атлет!

Мәсіхшілік өміріндегі “жүгірісін” қалай? Елші Пауыл біз әлемдегі ең маңызды жүгіру жарысының қатысушыларымыз дейді. “Мен жүлдеге жебедей ұмтылудамын. Ал ол жүлде — Құдай Иса Мәсіх арқылы бізді шақырған жаңа өмір” (Грек тілінен жаңа аударма). “Құдайдың сыйына — Оның Иса Мәсіх арқылы шақырған көктегі өміріне ие болу үшін көздеген максатты қуып келемін” (Філіпіліктерге арналған хат 3:14). Елші Пауыл ежелгі олимпиадалық жарыстарды бейнелейді. Ал біз қазір одан да маңыздырақ жүгіру жарысына қатысудамыз және жететін нәтижеміз де тұрақты, берік.

Тәртіп — бұл жақсы атлеттің өмір сүру салты. Жеңіске апаратын жол — бұл онай шаруа емес. Тәртіптің бір бөлігі — мойынсұну. Исаның шәкірті болу дегеніміз осыны білдіреді. “Балуан күрес тәртібін бұзса, жүлдені жеңіп ала алмайды” (Тімотеге арналған 2-хат 2:5), яғни Иса Мәсіх беретін сыйға ие болу үшін Оның өсиеттеріне мойынсұнуға жаттығу керек. Құтқарылу — Иса Мәсіхке “сену, сонымен қатар мойынсұну” дегенді білдіреді (Римдіктерге арналған хат 14:25). Біз Ізгі хабар талаптарын орындау үшін жұмыс жасауымыз қажет. Тәртіп бар назарымызды аударуды қажет етеді. “Сондықтан да бізге бөгет болатынның барлығынан, әсіресе тез шырмап алатын әрбір күнәдан арылып, алдымыздағы «жарысты» қажырлылықпен аяқтайық” (Еврейлерге арналған хат 12:1). Біздің көптеген әдеттеріміз, сөздеріміз және іс-әрекеттеріміз

Құдайға ұнамсыз. Еркін жүгіре алуымыз үшін бұлардың бәрінен толығымен арылуымыз қажет.

Исаның соңынан еру — қысқа шақырымға жүгіру емес, бұл — ұзақ жарысқа түсу, яғни марафон. Тәртіп шыдамдылықты талап етеді, “жарысты ең жүйрік, шайқасты ең қуатты жан жеңе бермейді екен” (Уағыздаушы 9:11). Құдай Ишая пайғамбар арқылы былай деген: “Ал сенім артқандар Тәңір Иеге жана күш-қуатты иемденеді, қырандай қанаттарын жайып кенге, самғай жөнеледі, алайда талмайды, жүре береді, бірақ болдырмайды” (Ишая пайғамбардың жазбасы 40:31). Осындағы тәртіпке көңіл бөлейік. Алдымен, қанаттарын жаяды, ұшады, одан кейін самғай жөнеледі, ең соңында жүре береді, яғни бұл — ең жоғарғы шек! Кей кездері Мәсіхтегі өмірімізде сенім “қанаттары” арқылы ұшамыз. Сен сенуші болу туралы шешімді осындай ғажайып қуанышпен қабылдаған шығарсың. Сынақтар кезінде тоқтамастан жүгіруіміз, еш болдырмауымыз үшін бізге Құдайдың күші керек. Мұндай ерекше жағдайларда бізге қажетті күшті Құдайдың Өзі береді. Жоғарыда келтірілген аятта айтылғандай, мәсіхшілік өміріміздің үлкен бөлігі — Құдаймен күнделікті тығыз қарым-қатынастағы өмір, мойынсұну және алған бағыттан таймау. Яғни, Құдайға үнемі сенім артып жүру — сенімнің шарықтау шегі. Жексенбілік қауым жиналыстарында ғажайып рухани “биікке” жетуіміз неткен тамаша! Алайда, біздің сеніміміз дүйсенбіден сенбіге дейін, үйімізде, мектепте, жұмыс орнымызда ғана сынақтан өтеді. Қайда бармасақ та Мәсіхпен бірге жүреміз бе? Иса Мәсіхпен жүруіміздің адал да шынайы болуына қажетті рухани тәртіпті Құдайдың Өзі бергей.

Жақсы атлет жеңіске жету үшін жүгіреді. “Әрбір жарыскер барлық жағынан қатаң ұстамдылық танытады. Оның алғысы келетіні — солып қалатын гүлдестесі ғана, ал біздің алатынымыз — мәңгі солмайтын «жеңіс тәжі»” (Қорынттықтарға арналған 1-хат 9:25). “Енді мені «жеңімпаздың жүлдесі» — әділдіктің тәжі күтіп тұр, оны маған сол күні әділ Төреші — Иеміз бермек” (Тімотеге арналған 2-хат 4:8). Сонымен, Мәсіхтегі өмір жарысқа ұқсас: күрес, табанды еңбек, тәртіп және данқ.

Шынығуыңды жалғастыра бер!

Исаның бауырың.

Әрі қарай ойлануың үшін: үнемі жаттығып жүрген қымбатты атлет!

Кейде мәсіхтік өмірімізде ұнжырғамыз түсуі мүмкін. Табыну арқылы Құдай Сөзінен, Рухынан жаңадан күш алып тұруға уақытыңды бөл.

Киелі кітаптың қандай аяттары саған көбірек ұнайды?

Бірге жұмыс жасайтын адамдар сенуші екеніңді біле ме?



Қымбатты өгін орудың диқан!

Жазғы егістен кейін жиналған жемістерді жеудің өзі қандай қуаныш! Иә, жемістер тәтті, ал еңбегі ауыр. Қала тұрғындары диқандардың еңбегін түсіне бермейді. Алайда, диқандардың еңбегінсіз азықтана алмас едік. Киелі кітапта Исаның соңынан еруге шақыруды суреттеу үшін диқан мысалға келтіріледі.

Ауыл шаруашылығымен айналысу — өте қиын жұмыс. “Жиналған өнімнен үлесін ең алдымен жан сала еңбектенген диқан алуға тиіс” (Тимотеге арналған 2-хат 2:6). Егістікті тазалау, тұқым себу, арам шөптермен алысу, піскен егінді жинау — мұның бәрі ауыр міндеттер. Киелі кітапта біздің осындай жолмен “сүйіспеншілік, қуаныш, тыныштық, шыдамдылық, қайырымдылық, кең пейілділік, сенімділік, ілтипаттылық, ұстамдылық” сияқты игілікті жемістер (Ғалаттықтарға арналған хат 5:22-23) әкелуімізді талап етеді. Ол үшін біраз еңбектену қажет. Мұндай әділ қасиеттер күнәкар болмысымызға қайшы келеді. Айналамыздағы адамдар сенбеушілер болса, күнәның азғырушы күшіне қарсы тұру өте қиын. Алайда, Құдайдың рақымдылығында рухани өсу үшін қажырлы еңбек ету бекер емес. “Жақсылық жасаудан талмайық! Себебі бұдан шаршап, бас тартпасақ, тиісті уақытта оның игілікті өнімін Құдайдан қабылдайтын боламыз” (Ғалаттықтарға арналған хат 6:9). Біз мәңгілік өмірдің өнімін орамыз.

Ауыл шаруашылығымен айналысу тұрақтылықты қажет етеді. Егер біз егістікке қажетті көңіл бөлмесек, тіпті аз ғана уақыттың ішінде өнімнен айырылуымыз мүмкін. “Танертен тұқымды сеп, кешке де қол қусырып отырушы болма. Өйткені қайсысы өнімді болады, анаусы ма, мынаушы ма, әлде екеуі де бітік шыға ма, соны білмейсің” (Уағыздаушы 11:6). Бұл аят біздің тапқыр, қайсар, тұрақты болуымызға үйретеді. Исадағы өмір біз Құдайдың көмегі арқылы жеңіп шығуға тиісті қиыншылықтар мен кездейсоқтықтарға толы. Сонымен қатар, Иса біздің адал дикан болғанымызды талап етеді (Матай жазған Ізгі хабар 13:24-30, 36-43). Шынайы сенуші өзінің рухани бағын әрқашан баптап күтеді. Ауыл шаруашылығымен айналысу даналықты да талап етеді. Жақсы диканға білім де, даналық та қажет. Білім — бұл дұрыс ақпарат, ал даналық — осы ақпаратты дұрыс пайдалану. Енбегінің табысты болып, егістіктен мол өнім алуы үшін қажет ауа райының болжамы, жердің сапасы мен құнарлығы, тұқым, өсімдіктер жайлы ақпараттардан дикан хабардар. Сонымен бірге, оған осы ақпараттарды өмірде болатын құбылмалы мезгілдік жағдайларда дұрыс пайдалана алуы үшін даналық та қажет. Даналық диканға қайдан келеді? “Ол Құдайдан келеді... Оның даналығы ұлы!” (Ишай пайғамбардың жазбасы 28:23-29). Біз Құдай және Оның Сөзі жайлы көп ізденуіміз керек. Өміріміздің акырына дейін біз Құдай Патшалығының шәкірттеріміз. Құдай бар білімімізді өмірімізде қолданғанымызды қалайды. Сонда өміріміздің қаншалықты өзгергенін байқай аламыз, сонымен қатар сенбеушілер де біздің өмірімізден шындықты, ақиқатты көре алады. “Құдайдың айтқандарын құр естіп қана қоймай, іске асырушы болындар! Әйтпесе өздерінді-өздерін алдайсындар” (Жақыптың хаты 1:22).

Сондай-ақ, ауыл шаруашылығымен айналысу төзімділікті талап етеді. Сен қажырлы енбек ете аласың, алайда өсімдікті күштеп өсіре алмайсың. “Диканға қарандаршы: ол егіндік жерінен алатын құнды өнімін тосып, оны күзгі және көктемгі жаңбырдың суаруын төзімділікпен күтеді. Сендер де сабырмен күтіп, жүректерің мызғымас табанды болсын. Өйткені Иеміз

жуырда қайтып келмек” (Жақыптың хаты 5:7-8).

Құтқарылу — бұл өмір бойына созылатын кезең. Сондықтан, өзіне де, басқаларға да төзімді бол. Төзімділік — бұл бір күндік емес. Ол — адал енбек етуіндегі сенімділік. Өнімнің Қожайыны бәрін бақылап отырғанын білесің.

Егін оруға қатысушы,

Моадағы бауырың.

Әрі қарай ойлануың үшін: егін орушы дикан

Құдайдың егінін оруға дайынсың ба?

Ал өзіңе жақын адамдар ше?

Соңғы уақытта Құдай Сөзінің дәнін қайсыбіреудің жүрегіне себе алдың ба?

Қандай да бір өсуді байқайсың ба? Ол үшін сиынуыңды жалғастыра бер.

Білім мен даналықта өсіп жатырсың ба?



Құдай әскерінің сарбазы!

Сәлем, қатардағы сарбаз! Шайқас қалай жүріп жатыр? Біз, мәсіхтің соңынан ерушілер, “адам баласына қарсы емес, қазіргі кара түнектің әкімдері мен күштілеріне, дүниені билеп-төстеушілеріне — көзге көрінбейтін дүниедегі зұлым рухтарға қарсы күресудеміз” (Ефестіктерге арналған хат 6:12). Елші Пауыл былай деген: “... біз Құдайдың адамдары мен зұлым рухтар арасындағы шайқасқа, рухани күреске қатысамыз”. Бұл туралы Киелі кітапта қалай суреттелгендігі жайлы Ефестіктерге арналған хаттың 6-тарауының 10-19 аяттарын оқып шық. Басқа діндегі, діни ағымдағы адамдарға қас емес екендігімізді есіңнен шығарма. Біз адамдарды өзінің еркіне бағындыру үшін тұзақта ұстап отырған шайтанның әрекеттеріне қарсы шығамыз (Тімотеге арналған 2-хат 2:26). Елші Пауыл біздің қаруымыз — “ақиқат, әділеттік, тыныштық, сенім және құтқарылу” сияқты рухани игіліктер деп түсіндіреді. Бұлар Құдайдың сүйіспеншілігі мен рақымдылығының қаруы.

Құдайдың сүйіспеншілігінің қаруы әлсіз емес. Тәңіріміз Иса Мәсіхке көк пен жердің барлық билігі берілген (Матай жазған Ізгі хабар 28:18). Оның бізге беретін қаруы — «Құдай құдіретінің қаруы» (Қорынттықтарға арналған 2-хат 10:3-5). Біздің айла-тәсіліміз — Киелі Рухтың күшімен Құдай Сөзін жариялау. Оның хабарының күші зор (Римдіктерге арналған хат 1:16). Кейбір адамдарға Иса Мәсіхтің айқыш ағашқа

шегеленгендігі туралы Ізгі хабары түкке тұрмайтын нәрсе сияқты көрінеді. Ал “шақырылғандар үшін Мәсіх — Құдайдың құдіреті мен даналығы” (Қорынттықтарға арналған 1-хат 1:24). Жек көрушіліктің қаруы әрқашан күйрейді. Иса былай дейді: “Семсеріне сенген семсерден өлер” (Матай жазған Ізгі хабар 26:52).

Бізге Иеміз Иса Мәсіх арқылы жеңісті сыйлайтын Құдайға мәңгі шүкірлік етілсін! (Қорынттықтарға арналған 1-хат 16:57). Мәсіхтің жеңіспен оралып, біздің шайқасымыз да бітіп, Ол Өзі патшалық құратын күн де туады (Аян 19:11-21). Ол күнге дейін сөнбес үмітпен күресімізді жалғастыра береміз.

Жаксы сарбаздың қолбасшысы болады. Ол өзінің қолбасшысының берген бұйрықтарын сыйлайды, бұлжытпай орындайды. Ол өз міндеттерін ешбір күмәнсыз орындайды. Осындай қасиеті үшін Иса бір римдік жүзбасын мақтаған еді (Матай жазған Ізгі хабар 8:5-9). Біздің қолбасшымыз — Құдай. Оның барлық тапсырмалары Киелі кітапта көрсетілген. “Ешбір сарбаз тұрмыстық істермен шырмалмайды, қайта, қолбасшысының көңілінен шығуға ұмтылады” (Тімотеге арналған 2-хат 2:4).

Сонымен қатар, жаксы сарбаз билік пен беделге ие. Біз басқалар үшін де жауаптымыз. Біз бағынатын (басшылар), бізге бағынатын (қол астымыздағылар) адамдар бар. Беделіміздің жоғары не төмендігіне қарамастан Құдай бізді қабылдайды. Билігіміз шектен шықпай, әрдайым сүйіспеншілікпен жүргізілуі тиіс. Қызмет етуші — Құдай Патшалығындағы ең ұлы адам. Иса осы дүниенің қалыптасқан үлгісінен өзгеше үлгіні қалыптастырды: “Қайсың ұлы болғын келсе, сол өзгелерге қызмет ете берсін, қайсың ең бастыларын болғысы келсе, сол сендерге құл іспетті қызмет ете берсін! Осы сияқты Мен де Құдай тағайындаған Билеуші бола тұра Өзіме қызмет еткізуге емес, өзім қызмет етіп, көптеген адамдардың азаттық төлемін өтеу үшін жанымды қиюға дүниеге келдім” (Матай жазған Ізгі хабар 20:26-28). Иса Өз шәкірттерінің аяқтарын жуып, біздің күнәларымыз үшін айқышқа шегеленген Қызметшінің керемет үлгісі (Жохан жазған Ізгі хабар 13:1-15). Оның осы бастамасы бойынша Құдай алдында жауаптымыз. Бар билік Оның

колында. Соғыс кезінде шайқастың “алдыңғы шебінде”, әдетте, әскердің аз ғана бөлігі тұрады. Олар жеңіске жету үшін майданда еңбектеніп жатқан 90 % адамдардың адал еңбектері мен қолдауына үміт артады. Әрбіріміздің Құдай әскерінде атқаратын маңызды міндетіміз бар. Егер аз нәрседе сенімді болсақ, онда атқаратын қызметіміз де өседі (Лұқа жазған Ізгі хабар 12:41-48). Бүкіл әлем Құдайдың құдіретке толы сүйіспеншілігін күтуде. “Сонда жеңісіне масайрап қуанамыз, Құдайымыздың атынан ту көтереміз... Біреулер мақтанар күймелерімен, біреулер мақтанар тұлпарымен, ал біз мақтанамыз Құдай Иемізбен” (Забур жырлары 19:6-8).

Күреске бірлесе қатысушы,

Исадағы бауырың.

Әрі қарай ойлануың үшін: Құдай әскерінің сарбазы

Адамдардың, әсіресе өзімізге ауыртпашылық әкелгендердің, бізге жау еместігін есімізде ұстау кейде қиынға соғады. Солар үшін сиынасың ба?

Кім сен үшін беделді? Рухани жетекшілерің кім?

Өзің қамқорлап жүрген, рухани жетегіңе мұқтаж адамдар бар ма? Бәріміз рухани шайқасқа қатысудамыз.

Көбіне не нәрсеге үміт артасың? Өз күшіңе ме, әлде Құдайдың қару-жарағына ма?



Қымбатты Исадағы босқын!

Мындаған адамдар соғыс салдарынан өз отандарынан қуылды. “Пілдер алысса, шөпке зиян келеді” деген Африка мәтелі бар. Шындығында, мындаған адамдар өз еріктерінсіз отбасыларынан, үй-жайынан, мүліктерінен айырылып, соғыстың босқындары болды. Исаның соңынан еруге шешім қабылдағанда, сен де “босқындық мәртебесін” тандадың.

Киелі кітапта мәсіхшілік өмірдің бір бөлігін сипаттау үшін “жат жерлік”, “келімсек” немесе “босқын” деген мағынасы ұқсас сөздер пайдаланылады. Осы сөздер арқылы сенушілер мен осы әлем арасындағы өзара қарым-қатынастың толығымен өзгергендігін түсіндіруге болады. Иса осындай қарым-қатынасты сипаттау үшін үш сөйлем қолданды: “Сенен оларды осы дүниеден әкет деп емес... олар осы күнәкар дүниенің адамдары емес... Мен оларды осы дүниеге жіберемін” (Жохан жазған Ізгі хабар 17:15-18). Біз сенуші болғанға дейінгі үйімізде тұра аламыз, алайда біз «осы дүниенікі емеспіз». Исаның сөздеріне сәйкес, “біз осы дүниедеміз», бірақ осы дүниелік емеспіз. Біз Оның босқындар ретінде жерге жіберілген елшілеріміз.

Босқын бір елден шыққан соң, екінші бір елге бағынады. Біз енді “осы күнәкар дүниенің тәңірі саналарын соқыр қылып қойғандар” емеспіз (Қорынттықтарға арналған 2-хат 4:4). Құдай бізді қара түнектің билігінен құтқарып, сүйікті рухани

Ұлы Иса Мәсіхтің Патшалығына енгізді. Оның құрбандық өлімі арқылы күнәларымыздың құнын өтеп, кешірім берді” (Қолостықтарға арналған хат 1:13-14).

Бұрын басқарып келген зұлым күштің билігі енді біз үшін жойылды. Енді өміріміздің билеушісі де басқарушысы да — Иса. Сонымен, біз — Құдай алдын ала тандап алған, осы күнәкар дүниеде жат жерлікпіз (Петірдің 1-хаты 1:1).

Босқын қауіпсіздікте болу үшін жан сауғалайды. Бұрынғы өміріміз өлімге апаратын жол болды. Күнәның беретіні мәңгілік өлім (Римдіктерге арналған хат 6:23). Босқын біржола қашады, олартына бұрылмайды. “Луттың әйелімен болған жайтты естеріне түсіріндер!” (Лұқа жазған Ізгі хабар 17:32). Бұрынғы ескі күнәкар жолынды тастадың ба? Жаман ойлар, әдепсіз жүріс-тұрыс, өркөкіректік, маскүнемдік, балағат сөздер, жалқаулық, билікті құрметтемеу, ақшақұмарлық және т.б. күнәлар өлімге апарады. Мүмкін саған кейбір достарыңмен араласпауға тура келер, “араммен араласқан жан адал әдетінен айырылады” (Қорынттықтарға арналған 1-хат 15:33). Қорықпа, Құдай саған олардан да жақсы достар береді (Марка жазған Ізгі хабар 10:29-30).

Босқын еш жерде өзін “өз үйіндегідей” сезіне алмайды. “Біздің отанымыз көкте, сондықтан Құтқарушымызды — Иеміз Иса Мәсіхті сағына күтеміз” (Філіпіліктерге арналған хат 3:20). Біз жерде босқын ретінде өмір сүреміз. Шайтанның билігіндегі адамның тек жер бетіндегі өмірі ғана бар, сондықтан оның осы өмірдің барлық ләззатын іздеуден-ақ қолы босамайды. Бірақ олар мәңгілік емес (Матай жазған Ізгі хабар 6:19-21). Мұның орнына, Құдайдың халқы “өздерінің жер бетінде тек жат жерлік келімсек ретінде тұрғандарын мойындады... олар көктегі отандарын ансап күтті... Ол көкке мәңгілік қала дайындап та қойды” (Еврейлерге арналған хат 11:13-16). Сен өз үйінде, мектепте немесе басқа адамдар арасында да келімсек, жат жерлік бола аласың. Исадан бас тартқан адамдар сенен де бас тартуы мүмкін. Босқын болу онай емес. Алайда бұл мәңгілік өмірге жетудің жалғыз жолы. Құдайдың халқы жайлы Киелі кітапта былай делінген: “Күнәкар дүние сондай ер жүрек

адамдарға лайықсыз еді! Олар айдалада таулы-тасты жерлерде қаңғып жүріп, үңгірлер мен апандарда жасырынып өмір сүрді” (Еврейлерге арналған хат 11:38).

Көктегі үйімізге жетуді асыға күтуші,

Моисея бауырың.

Әрі қарай ойлануың үшін: Исадағы босқын

Бұрынғы өміріңде араласқан адамдардан алыстау саған ауыр тиді ме?

Олар үшін сиынасың ба?

Басқа сенушілермен достастың ба?

Кейде сенуші достарымыздан да көңіліміз қалуы мүмкін. Алайда Құдайдың бізге шыдамдылық көрсететініндей, сен де оларға шыдамды бол.

Кейде сенде “жер бетінде үйіңнің жоқтығы” туралы сезім пайда болады ма?

Осы өмірде бұдан жақсы мекенге бару үшін саяхат жасап жүргенімізді ұмытпа.



Мәсіхтегі жаңа дос!

Өз ойларыммен сенімен бөлісу мен үшін үлкен құрмет. Құдай осы хаттарды Мәсіхтегі жаңа өміріне көмек ретінде пайдалансын деп сиынамын. Мен де сенің Исада кездестірген көптеген жаңа достарыңның бірімін деген үміттемін. Киелі кітаптың таңғажайып ілімдерінің бірі — біздің Құдайға дос екендігіміз. Ыбырайым “Құдайдың досы” болды (Шежірелер туралы 2-жазба 20:7; Ишая пайғамбардың жазбасы 41:8). “Сенімнің Атасы” жайлы ұлы оқиғаны оқығанда (Римдіктерге арналған хат 4:11), Құдайдың Ыбырайымды Өзінің досы санағандығына таң қалмаймыз. Ал біз ше? Сен жанадан сенуші болғанда, әлі талай уақыт бойы сенімде өсу керектігін түсінуіне көмектескен бірнеше істер жасаған шығарсың. Сенуші болғаным көп жылдар болғанына қарамастан, осындай өзгерістерге мен де жиі ұшыраймын. Біз қалайша Құдаймен достаса аламыз?

Құдаймен достығымыз біздің қандай әрекет ететіндігімізге емес, Кімді білетіндігімізге негізделеді. Иса былай деген: “Адамның достарына көрсететіні зор сүйіспеншілігі — олар үшін өмірін құрбан ету. Маған доссындар, қайта Мен сендерді тандап алдым” (Жохан жазған Ізгі хабар 15:13-16). Иса бізбен достасу үшін бастаманы бірінші Өзі алғандығына үйретеді. Алдымен бізді Ол тандады. Ол бастаманы Өзі алып, біз үшін өмірін қиды. Біз Құдаймен доспыз, себебі Исаны білеміз. Ол салықшылармен, күнәкарлармен де дос болды (Лұқа жазған Ізгі хабар 7:34).

Ыбырайым өздігінен ұлы адам болған жоқ. Оны Құдай солай етті. Құдайдың Ыбырайымға Өз уәделерін бергендігі жайында Киелі кітапта “Ыбырайым Тәңір Иеге сенді, сондықтан Иеміз оны Өзінің алдында ақтады. Бұл уәде Ыбырайымға заңды ұстанғаны үшін емес, сенімі арқылы ақталғаны үшін берілді” деп жазылған (Римдіктерге арналған хат 4:13). Елші Пауыл Ыбырайым сияқты сенімдері барлардың бәріне Құдай уәделері олардың сенімдеріне байланысты берілетіндігін айтады (Римдіктерге арналған хат 4:16). Сондықтан, егер Құдаймен достығың өз күшіне байланысты болар деген оймен азғырылатын болсаң, достықты Құдайдың Өзі жаратқанына және Өзі қолдайтынына қуан. “Біз сүйеміз, себебі Ол бізді алдымен сүйді” (Жоханның 1-хаты 4:19).

Құдаймен достығымыз біздің осы әлеммен достығымызды ажыратуы керек. “Міне, Мен есікалдына келіп, қағып тұрмын. Кімде-кім дауысымды естіп, есікті ашса, Мен оның жан-дүниесіне еніп, онымен бірге дастарқандас боламын” (Аян 3:20). Исаның осы шақыруы сенушілерге, яғни біздерге берілген ерекше уәде. Сенің Құдаймен достығыңда өскін келе ме? Онымен байланысыңның жақсы болғанын қалайсың ба? Ол есікті қағып тұр. Ол күтіп тұр. Ол сенімен өте тығыз байланыста болғысы келеді. Иса: “Менің тапсырғандарымды орындасандар, Маған доссындар”, — дейді (Жохан жазған Ізгі хабар 15:14). Оның осы әңгімесінде шәкірттеріне берген өсиеті: “бір-бірінді сүйіндер” (15:12) және “жеміс беріндер... сол жемістерің тұрақты болсын” (15:16). Құдаймен достығымыз өмірімізден көрінеді. Жақып Құдаймен достыққа немқұрайлы қарайтындарды әшкерелейді: “Әй, опасыздар! Осы күнәкар дүниемен достасу Құдайға қастық екенін білмейтін бе едіңдер? Осы дүниемен дос болғысы келген әркім Құдайдың жауына айналды” (Жақыптың хаты 4:4). Құдаймен жаңа достығың күннен күнге нығая берсін!

Құдаймен достығымыз мәңгілік болады. Киелі кітапты жазушылар Ыбырайым өлген соң көп уақыт өткеннен кейін “Ыбырайым, Ысқақ және Жақыптың Құдайы өлгендердің емес, тірілердің Құдайы” екендігін түсінді (Матай жазған Ізгі хабар 22:32). Құдаймен достығымыз өлімімізбен аяқталмайды, қайта, ол одан әрі ғажайып бола түседі. Біз Онымен, көктегі Оның барлық достарымен де мәңгілік достықта боламыз.

Шомылдырушы Жакия өзінің Исамен ара қатынасын “Қалындығы бар кісі – күйеу жігіт қой. Ал күтіп тұрған досы оның дауысын естіп, қуанады. Қазір менің қуанышым қойныма сыймай тұр” (Жохан жазған Ізгі хабар 3:29) деп сипаттайды. Осы шексіз, ағыл-тегіл мол қуаныш күйеу жігітпен бірге отырғанда бізде де болады. “Токтының үйлену тойына шақырылғандар бақытты” (Аян 19:9).

Осы керемет күн туғанша сеніміңнен таймай, рақымдылықта нығайып, сүйіспеншілікте өмір кешуіңді жалғастыра бер.

Оның мерекесінде кездескенше!

Құдайдың бауырың, Бағушы Марк Блэйр.

Әрі қарай ойлануың үшін: Мәсіхтегі жаңа дос

Өмірде екі ғана бағыт бар екенін толығымен түсінген боларсың. Оның бірі - Құдайға еру, екіншісі - Одан алыстау. Ал сен қай жолмен жүріп келесің?

Құдайдан алыстап бара жатқаныңды сезгенде қандай шара қолданасың?

Онымен бірге жүруде қалай тұрақты бола аласың? Бірге жүру өте ұзақ әрі керемет. Ол сен үшін әрдайым қуаныш болсын және бұл қуанышың басқа адамдар үшін жарық бола берсін!

Аудармашы: Мұратбаев Марат

Суретші: Нелли Бубэ

ISBN 0-9727543-8-5

«Үміт», 480009, Алматы қаласы, Гагарин даңғылы, а/ж 38.